

## গীতালি

৪

আমি হৃদয়েতে পথ কেটেছি  
সেথায় চরণ পড়ে  
তোমার সেথায় চরণ পড়ে ।  
তাই ত আমার সকল পরাণ  
কাঁপ্চে ব্যথার ভরে গো  
কাঁপ্চে থরথরে ।

## গীতালি

ব্যথাপথের পথিক তুমি,  
চরণ চলে ব্যথা চুমি',  
কাঁদন দিয়ে সাধন আমার  
চিরদিনের তরে গো  
চিরজীবন ধরে' ।

নয়নজলের বন্যা দেখে  
ভয় করিনে আর,  
আমি ভয় করিনে আর ।  
মরণ-টানে টেনে আমায়  
করিয়ে দেবে পার,  
আমি তরব পারাবার ।

ঝড়ের হাওয়া আকুল গানে  
বইচে আজি তোমার পানে,  
ডুবিয়ে তরী ঝাঁপিয়ে পড়ি  
ঠেক্‌ব চরণ-পরে,  
আমি বাঁচব চরণ ধরে' ॥

৯ ভাদ্র ১৩২১  
কলিকাতা

## গীত্রালি

৫

আলো যে

যায় রে দেখা—

হৃদয়ের পূব-গগনে

সোনার রেখা ।

এবারে ঘুচল কি ভয় ?

এবারে হবে কি জয় ?

আকাশে হ'ল কি ক্ষয়

কালীর লেখা ?

কারে ঐ

যায় গো দেখা,

হৃদয়ের সাগরতীরে

দাঁড়িয়ে একা ?

ওরে তুই সকল ভুলে

চেয়ে থাক্ নয়ন তুলে,—

নীরবে চরণ-মূলে

মাথা ঠেকা ॥

৬ ভাদ্র ১৩২১

কলিকাতা